

O LE KERISO SOIFUA

O LE MOLIMAU A LE AU APOSETOLO

O LE EKALIESIA A IESU KERISO O LE AU PAIA O ASO E GATA AI

Ao tatou faamanatuina le soifua mai o Iesu Keriso i le lua afe tausaga talu ai, matou te tuuina atu la matou molimau i le moni o Lona soifua lē mafaatusalia ma le aoga e lē gata mai o Lana taulaga togiola sili. E leai lava se isi ua i ai se aafiaga matua loloto na'uā o i latou uma na soifua ma o le a soifua ai i luga o le fogaeleele.

O Ia o le Ieova Silisili o le Feagaiga Tuai, o le Mesia o le Feagaiga Fou. O Ia o lē na foafoaina le lalolagi, i lalo o le taitaiga a Lona Tama. “Na ia faia mea uma lava; e leai foi se mea e tasi na faia e le i faia e ia” (Ioane 1:3). E ui ina leai se agasala, ae na papatisoina o Ia ina ia faataunuu ai le amiotonu uma. Sa “femaliuai o ia ma agalelei” (Galuega 10:38), ae na lē amanaiaina o ia. O Lana talalelei o se savali o le filemu ma le agalelei. Na ia augani mai i tagata uma ina ia mulimuli atu i Lana faaitaiga. Na ia femaliuai i auala o Palesitina, e faamalolo i e mama'i, faapupula i e tauaso, ma faatutu mai e na oti. Na ia aoao atu upumoni o le faavavau, o le tulaga moni sa tatou i ai i le muai olaga, o le faamoemoega o lo tatou ola ai i le fogaeleele, ma le tulaga e mafai ona ausia e atalii ma afafine o le Atua i le olaga a sau.

Na Ia faatuina le faamanatuga e avea ma faamanatu o Lana taulaga togiola sili. Na pue faapagotaina o Ia ma faasalaina i ni tuua'iga sese, na ta'usalaina ina ia faamalie ai le motu o tagata, ma faasalaina i le oti i luga o le satauro i Kalevario. Na Ia tuuina atu Lona soifua e togiola ai agasala a tagata uma. O Lana [taulaga] o se meaalofo sili foaifua mo i latou uma e soifua mai i luga o le fogaeleele.

Matou te ta'utino atu i upu ma le faamaoni a'ia'i, o Lona soifua, lea e totonugalemu i le talafaasolopito o tagata uma, e le'i amataina mai i Peteleema pe faaiuina foi i luga o Kalevario. O Ia o le Ulumatua a le Tama, o le Alo Pele e Toatasi i la le tino, o le Faaola ia o le lalolagi.

Na toe tu mai o Ia mai le tuugamau e “avea ma faapolopolo o e ua momoe” (1 Korinito 15:20). I Lona tulaga o se Alii Toetu, na Ia asiasi atu ai ia i latou na alofagia e ia i le olaga nei. Na ia asiasi atu foi i isi o Ana “mamoe” (Ioane 10:16) i Amerika anamua. I le lalolagi i nei ona po, na faaali atu ai o Ia

ma Lona Tama i le taulealea o Iosefa Samita, i le amataga o le oo mai o le “sauniga i le faaatoaga o tausaga” (Efeso 1:10).

Na tusia e le Perofeta o Iosefa e faatatau i le Keriso Soifua, “O ona fofoga e pei o le afi mumu; o lauao o lona ao e sinasina e pei o le kiona mama; a e sili le pupula o ona fofoga i lo le pupula o le la; ma o lona siufofoga e pei o le taalili o vai tetele, o le siufofoga lava o Ieova, ua faapea mai:

“O a'u lē muamua ma lē mulimuli; o a'u o lē o loo ola, o a'u o lē na fasiotia; o a'u o lo outou fautua i le Tama. MFF 110:3–4.”

Na folafola mai foi e le Perofeta e uiga ia te Ia: “O lenei, ina ua uma ona faia molimau e tele e uiga ia te ia, o le molimau tupito mulimuli lenei i mau uma lava, mā te faia ia te ia: O loo soifua o ia!

“Aua na mā vaaia o ia, i le itu taumatau lava o le Atua; na mā faalogoina foi le siufofoga o molimau mai o ia lava lea o lē Toatasi na Fanaua e le Tama.


“E mai ia te ia, ma ui mai ia te ia, ma o ia, na foafoaina ai lalolagi uma, o ē nonofo ai foi o atalii ma afafine na fanaua e le Atua.” (MFF 76:22–24).

Matou te folafola atu i upu ma le faamaoni a'ia'i, ua toefuataiina mai i le fogaeleele Lana perisitua ma Lana Ekalesia—“ua atina'e i luga o le faavae o le au aposetolo, atoa ma le au perofeta, o le maa tulimanu o Iesu Keriso lava lea” (Efeso 2:20).

Matou te ta'utino atu o le a i ai se aso e toe afio mai ai o Ia i le lalolagi. “Ona faaalua mai ai lea o le pupula o Ieova, e vaaia lava e tagata uma faatasi” (Isaia 40:5). O le a pule o Ia o le Tupu o Tupu ma nofotupu foi o le Alii o Alii, ma o le a tootutuli tulivae uma ma tapua'i laulaufaiva uma ia te Ia. O le a tatou tutu atu taitoatasi ina ia faamasinoina e Ia e tusa ma a tatou galuega ma manaoga o o tatou loto.

Matou te molimau atu, i le avea ai ma Ana Aposetolo ua faauuina i le ala e tatau ai—o Iesu o le Keriso Soifua, o le Alo tino ola pea o le Atua. O Ia o le Tupu silisili o Emanuelu, o loo afio i le taimi nei i le itu taumatau o Lona Tama. O Ia o le malamalama, o le ola, ma le faamoemoega o le lalolagi. Ia faafetaia le Atua mo le meaalofo lē mafaatusalia o Lona Alo paia lea.

O LE AU PERESITENE SILI



1 Ianuari, 2000

O LE KORAMA A LE TOASEFULULUA

